



Broj: 01/3-50-1-25-18/04
Sarajevo, 9. marta 2005. godine

**Z A P I S N I K
18. sjednice Komisije za vanjsku trgovinu i carine
Predstavničkog doma Parlamentarne skupštine BiH,
održane 9. marta 2005. godine**

Sjednica je počela u 14:00 sati.

Sjednicom je predsjedavao Petar Kunić, predsjedavajući Komisije.
Sjednici su prisustvovali: Marija Perkanović, Filip Andrić, Mladen Potočnik, Fatima Leho i Ibrahim Đedović.

Opravdano odsustvovali sa sjednice: Azra Hadžiahmetović, Dušanka Majkić i Izet Hadžić.

Za sjednicu Komisije je predložen i jednoglasno usvojen sljedeći

D N E V N I R E D

1. Usvajanje Zapisnika 17. sjednice Komisije
2. Utvrđivanje Prijedlog zakona o izmjeni Zakona o Carinskoj tarifi Bosne i Hercegovine (realizacija zaključka 17. sjednice Komisije)
3. Razmatranje Prijedloga Poslovnika Predstavničkog doma (izmjene i dopune sačinjene od Privremene komisije Doma, dostavljene 26.1.2005. godine)
4. Tekuća pitanja.

Ad-1

Zapisnik 17. sjednice Komisije usvojen je jednoglasno, bez primjedbi.

Ad-2

Utvrđivanje Prijedlog zakona o izmjeni Zakona o Carinskoj tarifi Bosne i Hercegovine (realizacija zaključka 17. sjednice Komisije)

Realizujući zaključka 17. sjednice, Komisije je razmotrila prijedlog teksta Zakona o izmjeni Zakona o carinskoj tarifi Bosne i Hercegovine i utvrdila Prijedlog zakona o izmjeni zakona o carinskoj tarifi Bosne i Hercegovine koji glasi:

**Z A K O N
O IZMJENI ZAKONA O CARINSKOJ TARIFI BOSNE I HERCEGOVINE**

Član 1.

U Zakonu o carinskoj tarifi Bosne i Hercegovine ("Službeni glasnik BiH", br. 1/98, 5/98, 7/98, 22/98, 31/02 i 32/04) i Odluke o usaglašavanju i utvrđivanju Carinske tarife BiH

za 2005. godinu ("Službeni glasnik BiH", broj 58/04) koja je sastavni dio Zakona o Carinskoj tarifi BiH u Dijelu 2-Popis carinskih dažbina u Glavi 21- Razni prehrambeni proizvodi tarifnog broja **2102 Kvasci (aktivni ili neaktivni); ostali jednoćelijski mikroorganizmi, mrtvi (osim cjepiva iz tarifnog broja 3002); pripremljeni praškovi za peciva: tarifne oznake 2102 10 – aktivni kvasci:**

tarifne oznake 2102 10 10 00 - **pekarski kvasac:** u

tarifnom podbroju 2102 10 31 00- **suhi...** iza stope carine **5** brišu se riječi: "**1,50 KM/kg**" i tarifnom podbroju 2100 10 39 00- **ostali...** iza stope carine **5** brišu se riječi: "**0,60 KM/kg**".

Član 2.

Ovaj zakon stupa na snagu osmog dana od dana objavljivanja u "Službenom glasniku BiH".

Komisija je jednoglasno **zaključila** da se tekst Zakona sa popratnim pismom uputi Vijeću ministara BiH, Ministarstvu vanjske trgovine i ekonomskih odnosa i Upravnom odboru Uprave za indirektno oporezivanje Bosne i Hercegovine radi provođenja procedure za dostavljanja mišljenja odnosno odobrenja za predložene izmjene carinske tarife, odnosno ukidanja dodatnih dažbina (prelevmana) na uvoz pekarskog svježeg i suhog kvasca.

Ad-3

Razmatranje Prijedloga Poslovnika Predstavničkog doma

Sekretar Komisije upoznala je prisutne da je na određene odredbe Poslovnika Doma portebno predložiti amandmane s ciljem: usklađivanja određenih odredbi sa zakonom; poboljšanja tekst; usklađivanja s prijedlogom izmjena i dopuna Poslovnika Doma naroda. Istakla je da je prethodno upoznala sekretara Doma o uočenim propustima i greškama i potrebu intervencije ulaganjem amandmana na određene odredbe Poslovnika te upoznala članove Komisije sa amandmanima.

U raspravi su učestvovali: Petar Kunić, Fatima Leho, Mladen Potočnik, Ibrahim Đedović i Filip Andrić.

Ibrahim Đedović je sugerisao da bi "nakon rasprave o principiuma zakona nadležne komisije počeo teći rok za amandmansku fazu, najkasnije sedam dana prije rasprave o amandmanima."

Filip Andrić kao član Privremene komisije za izradu izmjena i dopuna Poslovnika odgovorio je da je prilikom izrade ove materije u Poslovniku dato poboljšanje teksta.

Komisija je većinom glasova **zaključila da kao nenadležna komisija** na osnovu člana 86. Poslovnika Predstavničkog doma Parlamentarne skupštine Bosne i Hercegovine («Službeni glasnik BiH», broj 20/00), Ustavno-pravnoj komisiji Predstavničkog doma predloži sljedeće amandmane:

AMANDMAN I

U članu 13. stav (1) mijenja se i glasi:

« (1) U skladu sa Ustavom BiH i zakonom, poslanik neće biti pozvan na krivičnu i građansku odgovornost za bilo koje djelo izvršeno u okviru svojih dužnosti u Parlamentarnoj skupštini BiH.»

O b r a z l o ž e n j e

Odredba stava (1) člana 13. usklađena je sa članom IV.3. j) Ustava BiH i članom 3. stav 1. i članom 4. stav 2. Zakona o imunitetu Bosne i Hercegovine («Službeni glasnik BiH», broj 37/03).

Amandman II

U članu 32. stav (2) mijenja se i glasi:

«(2) Ako mjesto predsjedavajućeg komisije ili jednog od njegovih zamjenika ostane upražnjeno, komisija određuje jednog od svojih članova da privremeno popuni upražnjeno mjesto i o tome obavještava Dom».

O b r a z l o ž e n j e

Ovom odredbom reguliše se da je mjesto člana komisije trajno upražnjeno radi čega komisija određuje privremeno popunjavanje za obavljane dužnosti bilo predsjedavajućeg komisije ili njegovih zamjenika sve dok Dom ne provede proceduru izbora člana Doma i Komisije. Idenična je odredba i u Poslovniku Doma naroda.

AMANDMAN III

U članu 88. st. (1) i (2) mijenjaju se i glase:

»(2) Kompletni zapisnici sa rasprava u Domu, zakonodavne kao i najznačajnije aktivnosti u vezi sa radom Doma, komisija Doma i zajedničkih komisija dostupne su javnosti, a u skladu s mogućnostima PSBiH.

(3) Izuzetak iz st. (1) i (2) ovog člana su informacije za koje Dom utvrdi da njihovo otkrivanje može izazvati štetu po legitimne ciljeve sljedećih kategorija:

tekst tačaka a), b), c), d), e) i f) ostaje nepromjenjen».

O b r a z l o ž e n j e

Izmjenom stava (2) i (3) poboljšana je tekst, usklađen s odredbom Poslovnika Doma naroda, i u stavu (3) ugrađene su odredbe iz Zakona o slobodi pristupa informacijama u Bosni i Hercegovini («Službeni glasnik BiH», broj 29/00).

Amandman IV

U članu 102. stav (2) se briše.

O b r a z l o ž e n j e

Prema odredbama člana 31. stav 1. f) i stava 2., a u vezi sa članom 35. Poslovnika o radu Vijeća ministara BiH («Službeni glasnik BiH», broj 22/03) obrađivač zakona pribavlja mišljenje i Direkcije za evropske integracije o usklađenosti prijedloga zakona sa zakonodavstvom Evropske unije. Također u članu 98. stav (2) tačka b) i f) Prijedloga Poslovnika ova obaveza je sadržana vezano za obrazloženje zakona.

AMANDMAN V

U članu 124. stava (3) zadnja rečenica koja glasi:

”Kolegij može dodatno ograničiti koliko puta poslanik može dobiti riječ, kao i trajanje govora”.
se briše.

O b r a z l o ž e n j e

Navedena rečenica ne može biti u kontekstu člana 124. stav (3).
Odjeljak D Poslovnika-Održavanje reda , čl. 71. i 72. reguliše ovu materiju.

AMANDMAN VI

Naziv Odjeljka K. mijenja se i glasi:

Odjeljak K. Ovlaštenje za ratifikaciju međunarodnih ugovora i otkazivanje ugovora

Član 129. mijenja se i glasi:

“(1) Predsjedništvo BiH, u skladu sa Ustavom BiH i zakonom, podnosi Domu zahtjev za davanje saglasnosti za ratifikaciju ili otkazivanje ratifikovanih međunarodnih ugovora, sporazuma i konvencija.

(2) Tekst međunarodnih ugovora, sporazuma i konvencija nije podložan amandmanima”.

O b r a z l o ž e n j e

Odredbe usaglašene sa odredbama Poslovnika Doma naroda koje regulišu ovu materiju, a Dom će postupiti u skladu sa odredbama čl. 31., 32. i 33. Zakona o postupku zaključivanja i izvršavanja međunarodnih ugovora («Službeni glasnik BiH», broj 29/00).

Napomena: u cijelom tekstu Poslovnika potrebno je: uskladiti jezičko ujednačavanje u prijevodima; ispraviti graške u pogrešnom pozivanju na članove u članu 63. stav (1), članu 153 stav (4); koristiti jednoobraznost kod načina označavanja i pisanja stavova kod pozivanja na određene članove; da odredbe Poslovnika budu istovjetne sa odredbama Poslovnika Doma naroda kojima se reguliše ista materija.

Ad-4

Predsjedavajući Komisije u okviru tačke tekuća pitanja upoznao je prisutne da je obavio razgovor sa Martinom Ragužom, drugim zamjenikom predsjedavajućeg Predstavničkog doma s prijedlogom da se ravnomjerno sačini raspored putovanja članova Parlamentarne skupštine, istakavši da članovi Komisije do sada nisu bili u prilici putovati i upoznati se sa radom komisija evropskih parlamenata. Dogovoreno je da se uputi dopis Kolegiju Doma. Istakao je da su Komisije oba Doma do sada bili domaćini članovima Komisije za ekonomska pitanja Parlamenta Mađarske 20.3.2003. godine. U dva navrata Komisija se obratila Kolegiju Doma i inicirala isti prijedlog, ali bez rezultata.

U raspravi su učestvovali Mladen Potočnik i Fatima Leho.

Zaključeno je da se uputi pismo Kolegiju Predstavničkog doma u kome bi se inicirala u okviru međuparlamentarne saradnje posjeta članova Komisije parlamentima u cilju upoznavanja sa organizacijom, aktivnostima, funkcioniranjem i razmjenom iskustava u okviru djelokruga poslova komisija, s prijedlogom posjete Budimpešti, Kijevu i Moskvi.

Na prijedlog Fatime Leho **zaključeno** je da se urgira kod Vijeća ministara BiH dostavljanje odgovora na zaključke Komisije, koje do sada Vijeće ministara nije realizovalo.

Sjednica je završena u 14:40 .

Sekretar Komisije
Emira Češljarić

Predsjedavajući Komisije
dr. Petar Kunić